

摘藻堂四庫全書薈要

集部

欽定四庫全書薈要

集部

騎省集

卷八

六至

詳校官助教臣常循



欽定四庫全書薈要卷一萬四千一百一

集部

騎省集卷六

宋 徐鉉 撰

制誥十九首

保寧王制



昔先王聰明時憲文質載周親親之義莫之或改

乃知封建之重宗社攸賴友愛之美風教所先寅奉舊章  
敢忘循舉二十弟某稟質冲粹慎德孝恭出言有章好  
學不倦故我文考慈訓備隆而能踐修嘉猷惠迪前哲

卓爾令器時惟老成粵子眇冲肇當纘服賴貽謀之啟  
後仰垂鑒之在天尚念多艱懼弗克荷是用睦懿親以  
佑涼德班宗彞以懷萬邦錫爾以山川表爾以車服師  
長之任申而寵之敦叙之恩於是乎在於戲苴茅侯社  
禮莫縟焉連華棣萼親莫昵焉履信思順可以無悔尊  
師重道是以多聞盡愛敬以奉親顏極惠和以厚宗室  
勿怵勿墮有初有終服我訓詞永光懿烈可

南昌王制

門下昔西周之分陝服則曰風聲所存南朝之治揚州  
則曰本根攸寄非親賢碩望不足以表東夏非輔相重  
位不足以副具瞻天下為公百王不易肆予數命匪敢  
有私長子某敦信厚之風秉孝恭之德凡迪前烈率由  
生知自剖麟符往綏淮甸尊敬師保奉行詔條有所問  
而不干知為善之最樂東楚之俗尚風而安時以為能  
朕亦自慰夫陟明賞善有國大典苟得其所雖親何嫌  
是用特就留臺寵開相府崇貴之數儀制存焉噫為政

無他勤則有繼舉德甚易終之實難無以安佚自居而  
忘夙夜之戒無以驕貴自負而忽藥石之言治亂善敗  
則有先聖之遺經憲章文物則有中朝之成式諮訪佩  
服身先行之敬哉慎哉無忝多訓可

張居詠制

門下昔在先王任賢尚齒出將入相所以任賢也尊師  
重傅所以尚齒也況乎擇藩屏之寄膺輔導之求高步  
承華誕揚師訓克堪其選我有人焉某負貞幹之才稟

純厚之德亟更庶尹歷事累朝昇元始基賴其獻納故  
陟鸞臺之位爰立作相保大踰歲籍其綏懷故委龍節  
之權受脤於社懋乃嘉績叶于朕心殿邦政成輯瑞來  
觀方圖位著爰得僉諧而昔自故相已嘗為保重煩耆  
德俾傳東朝尊敬之儀典章斯在噫昔者叔孫䟽廣善  
於其職克繼來躅可不慎哉勉著嘉猷以副時望可

撫州節度使馬希崇除舒州節度使制

門下姬周同德曹叔封於王畿炎漢功臣楊僕恥居關

外是知藩翰之重所寄必同遠近之差以斯為寵我有  
成命爾其敬聽某識度恢宏風猷茂遠家勲蓋世不怙  
貴以驕人多難薦臻每忘身而濟物知能適變仁足亢  
宗來庭不俟於七旬保境豈徒於五郡劉總舉全燕之  
地弘正輸雄魏之邦故實攸存懋章何愜是用加之飫  
賜尊以上公陟負璽之崇資委建牙於列鎮虛襟而見  
側席與談言語有章威儀可則既叶歧予之望且堅戀  
闕之心藹爾誠明形於表疏愈歎忠勤之操宜更節制



之權而永泰全軍舒庸舊國地望無慚於汝水封疆密  
邇於王城用諧日近之言尚資河潤之福俾廻新命往  
受中權於戲大義昭彰朝恩渙汗千里之地可以觀政  
三軍之帥可以圖功永樹風聲無忘多訓可

太弟太保馮延巳落起復加特進制

門下爵賞之行憲章斯在急於務則適其變終其事則  
歸於禮將軍重位足以奪孝子之情特進崇班自昔冠  
諸侯之上申為懋典允屬公才某官馮延巳儒雅積中

機神應物風雲夙契魚水冥符處多士之朝副具瞻之  
望及移相府出鎮臨川封境綏懷聲猷茂遠頃集蓼莪  
之痛俯從金革之權露冕有誠輯瑞來覲疇咨舊德保  
佑東朝比疏傳之在前允諧擬議類魯公之拜後適就  
變除俾進宗階庶申優寵於戲將相之重資爾以惟聖  
儲兩之尊繫爾以成德知人則哲予用弗疑勉揚令圖  
無忝多訓可落起復冠軍大將軍加特進餘並如故

林仁肇浙西節度使制

門下建侯樹屏有國之攸先崇德報功百王之所共斯  
為令典予敢忘之鎮海軍節度浙江西道觀察等使留  
後金紫光祿大夫檢校太傅濟南縣開國伯食邑七百戶  
林仁肇稟此星芒鬱為時幹鼓鼙之氣指勅敵而愈高  
金石之心因時艱而益壯故能灼殊功於南部夷多壘  
於東門元戎所行績用昭著及總留務于浙之西成師  
著無犯之威察俗有惟清之化屹爾京口殷然長城予  
惟汝嘉俾正藩守因爾才略樹之風聲雄師大邦所以

屏王室尊官盛典所以懋官成惟惠惟和有嚴有翼使  
予無東顧之慮者繫其賴焉克堅一心以永百祿可依  
前檢校太傅兼御史大夫使持節都督潤州刺史充鎮  
海軍節度使浙江西道管内營田觀察處置等使功臣  
散官勲封如故

紀國公封鄧王加司空制

門下宗子維城良臣惟聖故有王社之數昴司之權親  
親賢賢古之大訓也我有成命時惟至公第七子某識

度淹通器質清粹就傳之歲威儀不忒出閣已來問望  
所著向由邦政入踐中樞內形將順之規外盡彌綸之  
業人知親附俗待和平邦家之基斯實攸賴今六駢巡  
守萬乘啟行方資扈蹕之勤宜有疇庸之典畫南陽而  
錫壤掌邦土以命官併加馭貴之資益峻具瞻之望於  
戲義極君父愛敬之道兼焉任綜文武弛張之政存焉  
爾其佩服前訓咨詢舊德勿驕勿惰有初有終永樹風  
聲以保元吉

上太后尊號制

門下膺昊天之眷荷宗社之重何嘗不嚴奉慈訓聿循孝理所以化成天下弘濟多艱親親尊尊教之大者也況沉潛之德丕顯於國風輔佐之勤光昭於王業今遺恩累洽靈鑒在天俾予小子恭踐大寶思弘任似之烈紹恢三五之基曩章盛典敢忘祇奉宜上大行國主皇后尊號為太后

太子少傅徐運授太子太保制

門下崇德尚賢推恩錄舊茲惟令典允屬時英予以眇  
躬嗣膺丕業戚藩之望羽翼之恩敢忘寵章用光師道  
某清直稟氣忠厚為賢實戚里之所宗歷累朝而見重  
敬慎即保家之主恭勤無出位之思爰自京口臨藩克  
貞師律鸞臺作相足厚時風留侯旋務於退身䟽受更  
聞於稱職純誠益著雅望攸高昨者預奉綴衣道揚未  
命忠貞以濟典禮無違顧惟冲人懼德弗嗣當此承祧  
之日益堅重傳之懷是用就改崇資仍加食賦於戲班

崇一品秩視三師苟非賢臣孰克臻此永期納誨無替  
令猷可

朱業江州節度使制

門下古者諸侯之賢入為卿士上公之寵出為方伯故  
中外之任踐更攸宜我有勲臣咸曰名將藩維宿衛夾  
輔冲人肆予仰成是用伸告某家傳武略天賦純誠名  
因勇聞位以材致周旋數紀佐佑累朝由裨將以統元  
戎勲勞滋茂自百城而登連帥聲政洽聞寵益盛而若



驚位益高而愈讓予纂服之始駿奔來朝且堅戀闕之  
心因處周廬之任忠貞彌固夙夜惟寅輦下肅清時乃  
之力永言舊德豈忘予懷會九江元侯入奉朝任中流  
之寄非賢不居是用輟蘭錡之權付金符之重往分巨  
屏更佇殊庸噫簡師旅以壯軍聲明紀律以宣庶政可  
畏可愛富之教之是汝所長無替前效陟明有典厥惟  
欽哉可

朱業宣州節度使制

門下車服之寵所以報功藩閫之權可以觀政茲為令  
典允屬信臣某智勇推高忠貞特立秉武經以致用服戎  
政以居多誠惓惓終始一揆及分符出守持節主留  
恩信並行職事畢舉肅連營而無犯視赤子以如傷所  
臨之方去思仍在向鍾多難入衛京師憂國忘家令行  
禁止羣情自固戎事以寧肆予仰成時乃之力今疆場  
甫靜蒸黎未康宣城與區國家巨屏方當謀帥是用策  
勲資果毅以壯先聲假惠和而蘓疲俗付爾節鉞往鎮

撫之惟爾慈儉足以安民剛正足以行法必當望風自  
理投刃皆虛宜弘寬大之規以集中庸之德勉茲具美  
永振嘉猷可

泉州節度使留從効檢校太師制

門下望高於朝則享師保之任惠加於物則進土田之  
封所以啟佑冲人藩屏王室者也我有寵數屬於元侯  
某山嶽儲精星芒稟異挺全才而應用激大義以致身  
而自際會先朝奮揚奇策靜二方之多難越萬里以來

庭故得倚作藩宣誓之帶礪而能恩威洽著紀律修明  
戎政有經理聲日遠黎獻有不欺之頌朝廷無南顧之  
憂茂績忠規古難其比粵予眇質嗣德弗明賴我友邦  
越乃賢帥推誠翼戴克荷景靈渙汗之恩唯恐不至是  
用增以井賦崇為太師美號峻階併伸殊渥噫乞言之  
禮可以觀德殿邦之寄可以樹勲勉揚令圖永錫繁祉  
可

右揆嚴續除司空兼門下侍郎平章事制

門下天作司牧必生丞弼非君臣同體道則不明非律

呂交感功則不濟粵予眇質負荷景重不有時賢豈戡

多難敬若先意疇茲舊臣具純粹炳靈惠和成性襲台

鼎之慶連肺腑之親歷奉累朝亟更庶尹憂國家之事

知無不為經夷險之間中立不倚言必由於忠信行必

自於誠明勞而弗矜謙以自牧先朝鑒其誠志任以腹

心頃當巡守之初俾貳主留之寄盡規竭慮夜思晝行

京輔以寧時乃之力及奉揚末命以佑冲人送往事居

禮無違者忠勲茂績入無間然今二后在天萬物思理  
予方乃眷民亦具瞻是用命作司空倚為左相兼國史  
樞機之任進方階食賦之資豈曰寵章是同憂責嗚呼  
受遺作弼厥惟艱哉爾其崇遠大之謨布簡寬之政詢  
歲諫之士塞便佞之言滿假自賢則其智益蔽虛懷接  
物則其猷益光念茲在茲以底于道可

信王改封江王加中書令制

門下唐堯之聖也既以序九族為先漢祖之隆也亦以

守四方在念矧予小子弗堪多艱實賴羣后共康烝民  
粵有賢侯亦在諸父庸勲表德敢或愛焉第二十叔某  
天賦機神生知禮樂肇開朱邸則孝敬之道升聞出建  
齋壇則威和之風遠振况五嶺之際俗雜地雄吏服其  
明民安其教煦如冬日隱若長城孤以不明祇奉丕緒  
資乃庶尹至於友邦師保之規既自家而刑國蓼蕭之  
澤當由親而及遠是用正左相之位崇三司之儀增賦  
進封併伸寵數於戲昔我文考並建懿親藩屏所繫社

稷是衛燕翼之旨可不勉歟敬佇嘉猷以永繁祉可

謝匡策加特進階增食邑

門下王者均慶推恩無遠弗及矧有舊德居然將臣方  
申求舊之懷豈愴疇庸之典某素推勇氣夙負壯圖立  
功旗鼓之間發跡風雲之會出分符竹入守關防翼衛  
天門董齊蘭錡咸著在公之績可觀適用之材享此期  
頤保茲優逸臻富壽之福全終始之名比之古人不可  
多得孤以眇質嗣守慶基方資無改之規式重後凋之



節俾升階序仍進戶封於戲二品崇資三朝貴仕人臣  
寵祿何以過斯勉荷朝恩永揚令問可

鄭王加元帥江寧尹制

門下睦親尊賢王者之盛業也中台上將有國之重任  
也是必疇咨公議稽若前經舉而行之謂之令典我有  
愛弟時維宗英論道經邦勲德滋茂肆予有命允叶厥  
中某挺命世之才秉生知之哲機神穎邁器宇冲深自  
寶玉分封緇衣授職內蘊清明之德外宣寅亮之功持

謙下之資以親附百姓體勤儉之節以表率時風學問該通每諮詢而自益忠誠孝悌常將順以無違昔者三后叶心十亂同德允茲古義非爾而誰粵予眇躬惠迪先訓獲守大業汔臻小康實繫手足之賢以集股肱之寄無德不報雖親何嫌是用誕舉渥恩就加名數夫元帥者民之司命中樞者國之宗臣尹京所以表則四方增封所以藩輔王室毗倚之重何以加斯於戲義兼國家權揔文武動靜之際治亂繫焉所先者在乎弼諧所慎

者在乎聽受清如止水故是非之說不可欺平如懸衡  
故善惡之徵不能惑有犯無隱非好異也不違如愚非  
苟合也惟公是務惟道是從所務必老成所親必端士  
服茲多訓永樹英聲可

朱業加中書令宣州節度使制

門下予嘗顧藩屏之重思黎獻之康欲使折衝之威迭  
行於封略惠和之化普及於方州既報政之屢聞乃改  
轅而敷寵咨爾賢帥聽吾話言某武毅致身忠厚成性

踐更事任昭著勲庸倚若金湯誓之帶礪自持使節出  
鎮中流恢簡易之風立嚴明之令仁而有斷吏不敢欺  
故使萬井阜安連營輯睦藹爾殿邦之績叶予進律之  
文率是通才何適不可予以宣城列鎮旬服輿區久闕  
元戎未孚王化藉爾有成之政副吾共理之懷右相之  
崇宰司所重申為殊獎以極朝恩於戲有惠於民有功  
於國中台貴位累鎮劇權苟非純誠何以臻此爾尚守  
益恭之節勵匪懈之心永懋嘉猷以光時望可

馬在貴加官制

門下盡忠於國者其報深有勞於事者其澤厚方切念  
功之義仍當均慶之初不有寵章孰先懋典馬某深沈  
有勇質重寡言少推學劍之能早識擇君之舉自策名  
旗鼓受任疆場履險身先有功不伐向分符竹實制要  
衝化行於富庶之時節著於艱難之際純誠懿績時論  
多之入總禁營遂成優秩富壽之福無闕敬慎之風愈  
高予惟汝嘉思有以勸屬此推恩之際俾升掌武之資

噫忠勲既明寵祿亦至終始之義今古所高勉揚令猷  
以享元吉

游簡言左僕射平章事制

門下昔在明王膺圖嗣統雖復格天光表繼文下武猶  
曰實相以濟又曰克艱厥臣矧惟寡昧疇咨庶尹若乃  
承弼之重毗倚之隆詢於具瞻敢或輕授游某世濟文  
雅挺生公器中興之始即為詞臣重熙在運亟更近署  
忠為令德實浮於名藹然直聲允洽時望先皇帝省方

展義分命羣司藉爾重臣輔予小子直躬無避正辭不  
諂竊從行闕克申其勞至於受命交兵之間抗節履危  
之際繇義以濟知無不為此皆古之所以為艱予之所  
以嘉尚者也間歲出於獨斷命長南宮議者但高其盡  
公之誠未許其理劇之用遂能正身而全當官不迴厲  
風霜之威以糾其慢堅夙夜之節以率其勤請託不行  
紀綱自舉羣議由是咸伏六職以之孔修風雨不渝始  
終一致實為國器想見古人而躬親簿領之間遽成勞

勩從容廟堂之上未盡謨猷疇庸之典予所多愧是  
用命作左相陟茲鸞臺進金紫之崇附典圖書之祕府  
勲爵并賦併示寵名於戲釋細務足以導節宣之和叅  
大政足以暢彌綸之業繫爾致君之效成我知臣之明  
往維欽哉無假多訓可

騎省集卷六



欽定四庫全書薈要卷一萬四千一百二

集部

騎省集卷七

宋 徐鉉 撰

制誥二十六首

李匡明御史大夫制

勅御史所職實為紀綱百官之邪得以歸正衆目不理  
得以舉明使朝廷凜然罔懈於位茲朕之攸賴而和庶  
政也向者治刑不暇官業靡申遂用省其訊鞫之煩委  
以澄清之寄庶循理本諒在得人通議大夫守吏部尚

書柱國賜紫金魚袋隴西縣開國子食邑五百戶李  
匡明學術優深德望清重可副丞相以鎮時風中散  
大夫守右常侍判御史臺事柱國賜紫金魚袋趙丕  
自掌憲司克勤于職而侍從之列朝夕論思期於弼  
違宜在專任今以庶獄移從理官可歸騎省以備顧  
問各踐乃位允期懋功匡明可御史大夫丕可守本  
官罷判臺事

宋齊丘知尚書省制

勅兩掖南宮樞機之地也元台上公股肱之寄也况親  
賢在位中外具瞻式叙彝倫爰申明命夫真宰之重大  
政咸歸出納王言固當綜錄侍中壽王某向兼南省未  
叶舊章宜罷判尚書省便領中書門下兩省事太保齊  
丘雖道在經邦方資納誨而事殷會府兼藉允釐可知  
尚書省事大元帥齊王總納百揆以貞萬邦凡百謨猷  
悉關獻替其三省事並取齊王參決朕允思恭已以荷  
景靈用一國之才敢辭則哲成天下之務庶叶無為方俟

沃心豈勞多訓

劉崇俊起復制

勅匡時啟運功臣威邊將軍濠州都團練觀察處置等  
使光祿大夫檢校太傅使持節濠州諸軍事守濠州刺  
史渦口兩城使兼御史大夫上柱國彭城縣開國子食  
邑五百戶劉崇俊濠上觀風克昭祖服光祿大夫檢校  
太保持節常州諸軍事守常州刺史兼御史大夫上柱  
國劉佑晉陵守土允茂政經而皆夙練軍聲習知邊要

方深朝寄遽屬內艱永言護塞之權宜舉墨綬之制俾  
加寵命改授階資勉抑孝心以從王事並可起復雲麾  
將軍餘如故

馮延魯江都少尹制

勅朝議郎行尚書虞部員外郎武騎尉賜緋魚袋馮延  
魯頃者尹縣留都首變田制克勤於事以利於人自歸  
朝行已踰周歲如聞衆庶未甚樂成矧彼浩穰所宜均  
一是用假爾亞尹往畢舊功具在條理得中厚薄無撓

俾乃比屋咸遂所安至於刑讞之繁亦以公平為用務令稱職無忝加恩可以本官判江都少尹公事

王彥儔加階制

勅王者旌董戎之功重殿邦之任疏寵之命因事有加所以勸能而佇效也佐時衛聖功臣建威將軍康化軍節度池州觀察處置等使起復雲麾將軍檢校太尉兼侍中使持節池州諸軍事池州刺史上柱國太原郡開國侯食邑二千戶王彥儔作鎮方隅克揚威信師謀不

撓庶政有常肅爾先聲宣我朝命向者起於哀制授以  
崇階禮適就於變除寄方隆於藩屏俾從增邑式示推  
恩勉揚令圖無替丕績可光祿大夫加食邑一千戶餘  
如故

李匡明舒州刺史制

勅通議大夫守御史大夫柱國賜紫金魚袋隴西縣開  
國子食邑五百戶李匡明向緣時望命長憲臺既歷歲  
時亦聞敬慎方佇茂績以光大猷遽覩拜章固辭重位

俾全寵遇宜輟準繩尚賴分憂無忘守節可檢校司徒  
兼御史大夫使持節舒州諸軍事守舒州刺史充本州  
團練使餘散官賜邑如故

趙丕御史中丞制

勅朕以御史未理庶政靡清思得良臣副吾慎選中散  
大夫守右散騎常侍柱國賜紫金魚袋天水縣開國子  
食邑五百戶趙丕再履憲署欽若攸司迭為侍臣匡予  
不及俾授格心之寄宜膺獨坐之權夫才識兼通然後



能得大體公正無黨然後能肅百司糾正失中則紀綱  
撓顧避不言則職業墮爾其欽哉無辱朕命可御史中  
丞餘官勲賜爵邑如故

陳褒制

勅出身事主忠之效也以年致政古之制也淳風將振  
斯道復行朕用嘉焉宜示優寵宣徽使其官陳褒以敬  
慎之操俊乂之才輔予潛九之初叶我司摠之寄出納  
惟允佐佑盡規勤勞王家數紀於是永念耆德方注虛

懷遽從知退之言亟有懸車之請雖面諭難抑豈舊功  
可忘而司衛列卿秩崇務簡俾退辭近侍猶在立朝勉  
廻高尚之心式重君臣之義可衛尉卿

杜昌業江州制

勅十連之帥百城之長藩屏王室其揆一也隨時省置  
何常之有焉朕祇荷慶基懋循古訓迭用舊德以頒詔  
條交修予違踐更爾位肆因大慶式舉朝章金紫光祿  
大夫上柱國京兆縣開國子食邑五百戶杜昌業始以

明敏肅恭服勞近密出納惟允固慎無違先帝用能委  
之邦政明九伐以恢王略堅一心以迪大猷六事允諧  
時乃之用將圖爾效且盡其才朕以中流之寄九江為  
重控五嶺之衝要鎮百蠻之驛騷屬予相臣入摠樞務  
惟爾公望克嗣其勲是用輟夏官之崇膺外臺之職尚  
虛使節以便理戎其往慎乃攸終遵我成憲簡易以申  
令恩信以即師惟惠惟忠無忝朕命依前檢校太保兼  
御史大夫使持節江州諸軍事江州刺史本州團練觀

察使散官勲如故

招討妖賊制

朕聞先王之靜人也四夷咸賓尚先慎德之誠一夫不獲則軫納隍之心是故導以仁聲決之惠澤猶不可化遂威有刑昨者嶺表遺氓聚為寇盜違其上命犯彼戰鋒而敢乘我國哀伺我邊隙侵迭我封部誘惑我黔黎保據谿山肆為剽掠朕以肇膺丕業先洽德音矧彼狂徒皆吾赤子弗忍盡殺冀其自新所以雖命師徒且令

招撫而克愚不革結聚愈繁暴害吏民攻圍縣邑一至  
於此其能久乎國有常刑吾又何愛仍聞衆軍致討累  
有殺傷平人無辜暴骨於野興言及此永惻朕心況常  
賦及期三農失業特申矜恤更示懷來虔州屬今年一  
應租稅並可放免仍委諸縣長吏安存編戶宣示國恩  
防護警巡勿令擾動妖賊張茂賢首為劫盜罪在難容  
若能束身歸降亦與洗滌收錄如聞命之後因循未賓  
即令招撫諸軍分路進討如所在百姓及徒黨中有能

擒斬茂賢者不計有官無官並賜三品賞錢一萬貫莊  
一區并已分產業並永放苗稅差役傳之子孫此恩不  
改若能同心計畫及數內或擒獲得稱王稱統軍軍使  
之屬并次第首級止於一隊一寨頭領者即約此例等  
降優賞放免苗稅差役或能自出身歸投有田畝者各  
令歸業仍放三年賦租無田者委本道錄奏各與逐便  
優穩安排及重加賞賚如克惡不同為諸軍擒獲者不  
問人數即便處斬明申威信汝自擇焉諸軍將士有能

斬獲茂賢殺戮支黨官賞之制並越常規予不食言爾  
宜自勵朕永惟止殺許彼悛心且妖賊等燒毀倉儲蹂  
踐禾稼聚食則資糧立盡外取則穀實不收進則火軍  
扼其前退則領兵倚其後况烏合之衆本不同心緩則  
苟避征租急則各圖恩賞函首來獻翹足可期咨爾羣  
黨等自保家鄉共思寧息與其碎身於鋒刃孰若樂業  
於閭里咨爾將士等各奮驍雄早成功績與其暴師於  
境上孰若受賞於轅門體我深懷速清邊徼布告本道

咸使聞知

魏王宣州大都督制

勅惟先王體國經野建邦設都並立懿親以藩王室當  
畿服之地則任輔翊之重有戎昭之績乃增督護之威  
是以王略恢而諸侯和矣宣城重鎮陪京之南制天險  
之津梁據三楚之襟帶境環千里邑聚萬民我朝以來  
戎寄尤切太師魏王受鉞先帝建牙是邦宣導皇風董  
齊師律生植茂遂禮讓興行時惟懋功叶此時論粵朕



小子懼德弗堪允孚大猷其在叔父雖師保之命已迪  
茂章而刺舉之名未極公望宜升大府式壯中權於戲  
立愛之恩予不敢怠敬保之義王其謂何勉啟乃心以  
底於道可升宣州為大都督府以魏王為宣州大都督  
府長史餘並如故仍編入冊命宣降

王崇文劉仁贍張鈞並本州觀察使制

勅守邊之要在乎崇垣翰而重威令也任能之方在乎  
因善政而加寵秩也懋迪斯道時惟令猷金紫光祿大

夫檢校太傅使持節吉州諸軍事守吉州刺史兼御史  
大夫上柱國太原縣開國男食邑三百戶王崇文儒雅  
飾身威猛宣用入奉旅賁之列出申刺舉之能光祿大  
夫檢校太傅使持節袁州諸軍事守袁州刺史兼御史  
大夫上柱國劉仁瞻沉厚有謀明斷能理護塞之略歷  
任弗遷光祿大夫檢校太傅使持節歙州諸軍事守歙  
州刺史兼御史大夫上柱國清河縣開國子食邑五百  
戶張鈞踐履班行昭著聲問守土之效一心靡違而皆

克嗣乃勲誕揚我武協比成績勤勞王家朕以眇躬欽  
承鴻業實賴良將綏安四方肆於布慶之辰而有加等  
之命就升使職並駕兼車仍崇馭貴之封增立將軍之  
號併申寵寄尚示克終無懈乃誠以底於理陟明有典  
予不敢忘崇文可光祿大夫依前檢校太傅使持節吉州  
諸軍事守吉州刺史兼御史大夫充本路都團練觀察  
處置等使進封開國子食邑五百戶仍賜號威勇將軍  
散官勲如故仁贍可依前檢校太傅使持節袁州諸軍

事素州刺史兼御史大夫充本州團練觀察處置等使  
封彭城縣開國男食邑三百戶仍賜號貞威將軍散官  
勲如故鈞可依前檢校太傅使持節歙州諸軍事守歙  
州刺史兼御史大夫充本州都團練觀察處置等使進  
封開國伯食邑七百戶仍賜號武威將軍散官勲如故  
高逸休壽州司馬制

勅朝議郎行素州司馬賜緋魚袋高逸休立身謹行聞  
於朝廷員才好謙老於州縣先皇獎異錫以銀章優秩

自居十數年矣其子煇秉乃直筆為吾史臣適當均慶之  
初先有腰金之命而愛敬之切發於中誠乞循廻授之  
文庶遂顯烈之義辭旨懇激覽之惻然俾允所陳且成  
其美仍加寵秩以就懸車噫望族舊人唯爾而已覩本  
朝之恢復拖紫綬以優游孝子克家耆年致養茲惟盛  
事足慰爾心可檢校尚書水部員外郎壽州都督府司  
馬致仕賜紫金魚袋

宣州營田副使兼馬步都指揮使李夢可節度

副使罷軍職

勅王者官人之旨必褒賢能而均勞逸也列辟垂憲予  
弗之忘某官李夢夙負壯圖少為裨將餘勇可賈有勞  
不矜泗水剖符邊候寧晏宣城從帥連營輯和而將領  
之權久煩耆德毗贊之任未極初筵俾援尚齒之文就  
疏加等之命勉承朝獎無替忠誠可

駕部郎中馮延巳兼起居郎屯田郎中閣居常  
兼起居室人

勅朕凝旒端冕以臨萬邦而左右史臣執簡近侍言動  
得失注記無回故布政罔不臧承化罔不若惟聖攸賴  
慎簡難虛臬官馮延巳君子之儒多聞為富發之為直  
氣播之為雄文某官閭居常行顧樞機學臻精博得廷  
臣之體多長者之言而皆踐彼周行奉予元子或奏記有  
翩翩之譽或鐫壘多疊疊之談藹然清風叶此時望是  
宜兼領郎署咸躋掖垣於戲君舉必書朕敢忘於恭已  
無德不報爾勿怠於懋官各振公才副茲多訓可

侍御史王仲連可起居舍人監察米崇楷可右

補闕

勅朕嘗思古先哲王所以致理區中垂憲萬祀者蓋有  
史臣以記其過有諫官以弼其違或面諍於廷或舉書  
於冊故政令所及罔不化成而怠惰之心無自入矣將振  
斯典必求其人某官王仲連爰籍才能亟叅秩序正已  
而率下盡節而向公某官米崇楷早負時名尋升閨籍  
佩韋以臨事慎獨以修身而並服豸冠或司糾憲或立



朝多按劾之奏或典刑有欽恤之心叶我懋章宜升右掖勉修官業以副簡求直筆正言無有所諱可

水部員外郎判刑部查文徽可侍御史知雜

勅秦漢以御史掌四方之記我朝以雜端正百官之邪其名則同所職實重副是慎選其惟通才某官查文徽克負美名早從交辟尋陟郎署升為王臣法讞之難俾其參決而察情無不當持議無不平俾上絕濫刑下知恥格率是幹用使持憲綱在能振舉霜威肅清朝序爾

其直躬而處衆正色以當官糾謬繩愆無或顧避陟明有典可不懋哉可

左常侍張義方可勤政殿學士

夫珥金貂直騎省以備顧問非不重也而文學之選宜又加焉某夙號名儒久登華貫臺閣踐歷聲實相符侍極而來當官無撓朕祇奉先烈勤求大中諮訪闕疑藉爾稽古特加近職以示開懷順美弼違無忘謹直

楚州刺史劉彥貞可本州觀察使

勅懋官之旨非增秩不足以示寵行邊之任非進號不足  
以申威施之具人是為令典某厚寬得衆深沉有謀  
克荷家聲累膺朝寄百城觀政三郡底寧而長淮上游  
地雄師衆刺舉之職未極當官廉問之權實諧僉議因  
是敷寵更佇厥成噫千里之長三軍之師任遇斯重勲  
庸是圖爾其敬哉無墮乃力可

外祖母追封某國夫人

勅昔帝欽明義先敦序九族既睦萬邦以懷矧乃推本

文之恩疏漏泉之澤有光茂典式表孝心外祖母李氏  
麗德坤儀垂訓內則儲慶漸生民之什顯魂開石窀之  
田庶予眇躬弗忘祇凜而嗣膺鴻業若涉大川奉長樂  
以自寧過躍龍而軫念追遠之數宜有加焉是用進啟  
大邦載崇懿號昭示戚里知予永懷可

大理卿判戶部刁紹可工部尚書

勅周禮六卿皆有軍政漢制尚書奏事禁中歷代親重  
也如是今予有命亦屬其才某官刁紹始以幹能屢參

繁劇向由卿寺踐歷省垣制國用而無違登生齒而有  
義丕顯成績是為才臣今朕祇嗣丕圖永懷司會俾率  
諸吏表於南宮爰陟冬卿式申慶澤爾其欽承彛訓修  
舉官司無忘克終以忝殊渥可

兵部侍郎張義方可左常侍

勅某珥貂服冕侍從獻替騎省之任也必以儒學大僚  
端方名士入膺茲選允叶懋章而爾義方可謂能矣踐  
歷臺省抑揚聲實純誠直道造次靡忘今予眇躬嗣守

不訓弗惠厥德思聞謹言乃均慶恩命為常侍從容左  
右敬佇嘉猷爾其念哉無渝乃節可

太常少卿李貽業可宗正卿

勅先王睦親也必求宗姓之賢者朝行之名臣為之表  
儀序其昭穆今我有命時惟舊章某官貽業學以潤身  
文以行禮貞以幹蠱直以事君有一於此足可嘉尚矧  
備四者非所謂名賢乎今朕嗣續丕基敷遵慶澤是用  
選於掌樂為我司屬使吾宗室有信厚之風非貽業而

誰勉修厥官無忝多訓可

左司郎中陳繼善可工部侍郎

勅國有六職百工預其一焉我朝已來其選尤重矧自  
尚書郎而擢拜者不具鮮歟某官陳某以幹蠱之才克  
肯構之美亟更庶尹遂歷省垣委之以繁雜之務而事  
益明兼之以權筦之司而利不匱弘羊心計亦莫加焉  
屬朕出震嗣圖施令布慶貳卿之任頗難其人今以繼  
善為之爾其可以稱職噫大僚之職存乎簡易興利之

要在乎廉平無渝乃誠以撓吾法可

水部郎中判刑部蕭儼可祠部郎中賜紫

勅某官蕭儼夫王者之為政也任能舉直理刑懋功如斯而已今秋官卿佐皆闕爾儼寔專其司定法察情克舉攸職切言直氣屢聞於朝靡私厥躬何其愛朕之深也方將圖效適屬均恩是用就升名曹仍加命服俾耀省闈時予寵章爾其念哉無易乃心無回乃行決獄以寬簡當官以公平一心克終予慎嘉汝可



屯田郎中李景進可工部郎中

勅某官李景進昔漢館陶公主為子求郎而不得何者  
非其人也今汝景進亦吾外戚而謹厚儒雅好學善言  
久為臺郎頗副時望故均慶澤擢轉名曹彼漢雅公而  
吾獎善兩得其道不亦宜乎

騎省集卷七

欽定四庫全書薈要卷一萬四千一百三

集部

騎省集卷八

宋 徐鉉 撰

制誥三十六首 祭告文二首

大府卿張援可司農卿兼大理寺事

書曰任官惟人又曰惟刑之恤朕服斯道因舉而行某  
官張援為性端方處衆和雅貞亮足以幹事哀矜足以  
得情亟更攸司弗易時用因子有慶期爾盡才命為大  
農俾掌廷尉於戲庶獄之慎不可忘也單辭而行不可

為也平反伏念夜思晝行尚于惜刑體我求理敬之哉  
權知江都令李潯正授

勅四京令之重也其選唯一是以試可以進之均慶以  
寵之盖欲慎厥官而安其政也某官李潯屢為長吏綽  
有能名東夏之理不易其操事簡俗便予甚多之爰用加  
恩俾從正授勉欽朝獎無懈乃心可

和州司馬潘處常可金部郎中

勅先王之制官刑也過無所隱其肆大青也善靡有違

無私之義於是乎在某早服時望亟更臺郎予在東朝列  
於賓席旋貳廷尉寔奉邦刑偶違伏念之言遽貽一黜之  
命今朕祇嗣丕業誕敷慶恩豈以職事之愆遂忘樽俎  
之舊是用召自近郡涉於南宮勉承寵光以永無咎可  
浙西判官高越可檢校水部郎中賜紫

勅王者之建藩輔也必命重臣以臨之又擇賢士以佐  
之政成當遷留而增秩古之制也高越以儒學淹雅見  
稱於時頃自南宮直於東觀筆削之言方勵弓旌之禮

是求從事大邦率多婉畫有嘉令望爰屬慶恩俾假正  
郎仍紆紫綬服我加等之命無懈盡規之心

安陸郡公景逵檢校司空太府少卿

勅夫太上立德其次親親能兼之者鮮矣惟是具美屬  
於我朝某孝友資身貞幹為質守樞機而無悔居富貴  
而不驕藹然善聲成此嘉器朕肇嚴丕業廣覃慶恩矧  
有名臣近在宗屬是用假以空土列於亞卿仍進崇階  
併示優寵於戲行為民則爾其勿忘愛克厥威朕不敢

尚服我多訓永揚令圖

保定郡公景迪可朝散大夫檢校左僕射賜紫  
勅朕歷選列辟見其睦親名器之難必當慎簡信不可  
私於其屬也故我疏寵務先推公保定郡公景迪靜惟  
端方動必孝敬師友之訓成信厚之風宗室之間聞  
望尤著屬我嗣服之始叶於立慶之恩爾其率循令猷  
惠迪前烈勿驕勿惰以永乃成

右拾遺鄭延樞可清江縣令賜緋

勅夫邑令之有聲者入奉清列諫官之滿歲者出宰百里蓋朝廷憂民立政之意也某官早歷官緒無廢官常擢叅禁垣克服彞憲而南楚大邑長吏尤難命自周行往宣朝旨仍加朱紱以示殊恩無易乃心勉修所職

浙西判官艾筠可江都少尹

勅天下之大建親分陝以尹之東夏之重選能設貳以維之茲用安民而政舉也某官艾筠識量純素學術通明奉我東朝周知其善輟借侯幕載揚令名海隅之康



苟有其力夫以亞尹之難如彼而有適用之才若此俾  
膺慎選不亦宜乎勉勵公方更施勤績

閤度可江寧府叅軍

勅鄉貢明經閤度士子起家而預清級者蓋亦有之自  
非才地兼茂則不能光朝命而叶時論矣以爾名父之  
子自強不息學業履行實浮於名屬予出震之初成我  
多士之世俾掾天府以漸亨衢無忘益恭更揚令聞

馮倜可秘書省正字

勅五品子馮倜蘭臺圖書之府起家而與之自非有才  
孰克處此以爾早服嚴訓實揚令名勵學檢身如恐不  
及成爾嘉器當我士林俾授初資以漸清貫無忘詩禮  
之學以益刊正之勤可

舒州司馬李景述可虞部郎中

勅王者用士其要惟公苟得其才近親何避某官李景  
述承茂勲之後秉素士之風頗有美名聞於戚里郎丞  
之任為父臺郎之位為宜俾䟽慶恩改授清級無忘師

友之訓以奉朝廷之儀

江州判官趙丕可司農卿

勅王者之正百官也黜其有過其肆大責也許以自新  
則邦典行而朝恩浹矣某官趙丕謹行以處衆克勤以  
在公臺省踐更誠心不替故先皇獎用寄以準繩而靡  
達官常自罹常憲朕纘承鴻業廣布慶恩以其久列班  
行偶因迷謬特申渥澤俾授正卿勉勵乃心佇揚令望  
江西推官成幼文可主客員外郎

勅諸侯之佐命於朝廷而治職有勞奏課稱最則當升  
諸閨籍補為省郎蓋勸能取士之旨也某從事大鎮於  
茲累年本以誠明濟之通敏論不阿諂政無頗邪一方  
允釐爾寔有力今予寵爾以立朝之位命爾以司藩之  
官爾其敬哉無忝我陟明之典

洪州判官袁特可浙西判官

勅袁特朕以關輔之大控制要津出保傅之重鎮之以  
屏王室擇賓從之賢佐之以齊政經而特尹縣神州理

甚簡便運籌盛府言必端詳叶于簡求宜授斯任夫潤  
之民固與洪無異而爾之操當與初不渝則官業允釐  
而朝獎無替矣敬服斯訓往勵乃司可

洪州掌書記喬匡舜可浙西掌書記賜紫制

勅喬匡舜朕以師傅之重敬而不違式遂便安俾臨闕  
輔而軍旅之事不可無佐奏記之任不可非才聞匡舜  
以高文受知以直道從事歷歲斯久弘益居多故因其  
賓席之資加以紫綬之貴改轅東適從吾上公無替初

心以忝朝命

知雜御史查文徽可起居郎樞密副使

勅秉記言之筆以侍左右受司聰之寄以典出納並居  
二職其可非才某官查文徽儒雅表文忠厚成質早踐  
華貫時為名臣以南宮清望之資當憲府雄極之任提  
綱有序而衆目以理正身自處而周行以清物論與之  
予用嘉尚居中理極不亦可乎噫為朕腹心注人耳目  
執節一懈悔咎隨之爾其慎之無忝吾命可

潤州丹徒令顧彥回可浙西推官

勅長人之吏親職為勞觀風之佐坐籌為異均其所任  
是曰優恩某官顧彥回以清節士風嘗參王府以耆年  
篤行出字齊民課績尤異自當優寵驅馳州縣非為所  
宜俾陟賓階奉我元老優游盛府足以光華

撫州刺史周弘祚可池州刺史

朕以將復淳風務先理道思得良二千石以安吾民倘  
副簡求迭受大郡斯蓋布政懋官之旨也某官周弘祚

勲臣之子雅有父風自服佩恩華踐更事任訓齊武力  
能得士心綏懷邊戎克壯兵略俗阜秩滿序勞當遷朕  
觀其才可謂良吏青陽名郡控制中流前所任者咸屬  
重望今以授爾爾其欽哉進爵升階式示兼寵苟勤節  
弗易地人來蘓考績策勲吾有異典

吉州判官鮑濤可虔州判官

勅虔之為鎮俗雜地廣化不可一時生寇攘萑苻既平  
閭井思乂可以佐吾良帥而寧吾齊民者也聞某官鮑



濤久倅列郡克舉官常從政以和理劇無滯況虔吉鄰  
郡聲績素彰便道之官率舊為用副茲慎選誰曰不然  
爾其敬承無忝明訓

給事中間居常可金紫檢校司空充廬州節度  
副使

勅王者推念舊之心申優賢之旨官序出處從其所安  
諒不可滯于一方也某官閫居常執心冲粹為學精博  
修賢人之業多長者之言粵予纂承實重舊德俾掌校

議直於瑣闥而无妄之疾未痊貞退之請彌切重違誠願抑此朝恩俾佐藩方式便頤養金印紫綬邦土憲司併申寵光以示優渥陟明之典當俟有瘳可

虞部員外郎史館修撰韓熙載可太常博士

勅某官韓熙載朕以因心之感同軌有期嚴恭禋祀仍從此始求所以節豐儉而振廢闕者屬於禮官慎選其人必在時彥以熙載學問精贍辭氣亮直本以通識濟之奇文惟名與實咸副是命故輟於東觀列於曲臺使

代稱禮樂之盛吾實有望於爾勉之哉

虞部員外郎史館修撰張緯可句容令

勅為政之要在乎安民長人之利在乎慎選故吾用古  
道擇尚書郎而命之某官張緯學問該通辭藝精絕自  
東朝載筆石室抽文朝論藹然以為名士矧又淵識理  
體周知物情是為通才何適不可王畿大邑既庶而富  
藉爾敏惠為吾教之仍假臺郎以伸朝獎苟聞報政豈  
恡加恩可

浙西判官高越可水部郎中

勅多士之世副臺郎之選者前代謂之賢乃知三署之屬例無輕授其官高越早踐朝序嘗為史臣當官有聲聚學不倦頃屬上將出臨大藩輒參入幕之資備觀理劇之用府罷赴闕時名益高司川之秩俾從真授無忘職業以荷朝恩

左監門將軍趙仁澤可寧國軍都虞候

勅南藩之寄宣城為最師勁而衆地近而雄故朝命列

授以貳軍事所以重其威令也某官趙仁澤名將之子頗有父風在軍積年武畧精練出宰大邑歸預禁營副子簡求俾隸宣部往綏乃績無替前勞

左司郎中高弼可元帥府書記

勅某官高弼王者之用師也必先以文告之命訓誓之辭故戎車之往記室為重而朕前委愛弟賢司邦政今命爾弼使典軍書任才責功其意斯在矧弼嘗叅西掖尋履南省所歷之任籍籍有聲今能奮雄辭而塞慎選

陟明之典予豈忘哉

左領軍將軍孔昌祚可泗州刺史

勅左領軍衛將軍甲仗宮城營造等使孔昌祚朕以長  
淮北徧隔閱戎夏惟彼泗口實當要衝凡為守臣罔不  
慎選而昌祚以貞幹事以勤懋德周廬巡徼之政宮禁  
繁劇之司董齊典理靡有違者歷歲且久秉心不渝朕  
觀其才可為邊將授以符竹付之臨淮爾其揚我武威  
修乃郡政登於考功之籍以塞任能之恩可

水部郎中方訥可主客郎中東都留守判官

勅某官方訥朕以分陝之任非親賢不可故迭用子弟  
以居守復以佩觿之齒唯訓導是務故慎選名德以從  
行而朕在東朝先皇命爾訥列我賓席參預文雅挹其  
風度將順規諷揖其忠誠尋又奉予愛子益固是道今  
所授任非訥而誰客曹正郎留臺幕職往示兼寵爾其  
敬哉乃心不渝懋典寧忘

秘書郎田霖可東都留守巡官

勅某官田霖朕命愛子表正東夏管記之任樽俎之間  
唯才與行乃可是選而朕在儲貳則嘗知霖文藝直心  
綽有餘裕累叅載筆之任近登秘籍之司列于王官頗  
叶時望故授以留臺之職副茲託乘之求爾往敬哉無  
忝予命

前山陽縣尉張師古可秘書省校書郎

勅王者之行慶也獎能振滯赦過責功如斯而已矣某  
前為縣佐以公事罷免而聞其立身修已有足多者故



從其滌瑕之命升諸秘籍之司往服乃官勿重而悔

江州錄事參軍王崇昭可江西觀察衙推

勅某官王崇昭西南大藩庶政繁會獄訟之理欽恤是  
先重輕一隨手足無措必得朝士以典掌之而聞崇昭  
可當斯任往蒞乃職無忘益恭

前舒州錄事參軍沈翺可大理司直

勅某蔭籍從仕以儒術資身蓬閣曳裾早揚聲聞侯藩  
載筆亦懋勤勞向事圭符實司經紀州縣之職非其所

長既失儀刑遂從罷秩今慶賞斯決一胥咸矜復爾名籍俾叅棘寺吾不記過爾其自修

前舒州刺史李匡明可中書侍郎

勅朕以不德恭承丕基思聞獻替之言以自開悟故於侍從之列尤用簡求矧乃職奉詔命地叅公輔歷代精選可虛授乎某以風度爽邁克嗣遺徽以文章弘雅累踐清途先皇器之任遇尤重故其冠翰苑掌天官長憲臺肅千里靖恭于位績用有成舒人既康執壁來覲宜

加疏等之命擢為鳳閣侍郎敬之哉夫出為諸侯非不  
貴也入首三品非無位也持重足以鎮物納忠足以報  
我匡正不逮予有望焉

歙州觀察推官翟延祚可水部員外郎

勅某以外諸侯吏入為尚書郎者非推恩酬勞何以臻  
此聞爾宰百里佐庶車皆有政能宜當選任往祇乃事  
無忝予恩

大理司直唐顥可監察御史

勅某夫御史之列皆一時之清選而貴仕所由漸也聞爾執心有常從事以直持刑甚平允當官有勤勞故升諸朝廷俾之察視爾其懋乃才用修我紀綱無傾側糾訐以為能無依阿顧避以自守勿貽爾悔以忝予恩

禮部員外郎馮延魯可中書舍人勤政殿學士勅侍從無職總同清要若乃叅書殿之列備切問之重使如綸之命式光人文無詢之言不入吾耳所寄若是其選可知某惟望與才皆副是任况東畿亞府有理劇

之用南宮禮典多伏奏之勤俾膺簡求必叶虛佇夫前  
言往行爾所祇服正辭讜論予之嘉聞無從非彛以忝  
多訓

筠州刺史林廷皓責授制

勅恥過作非言不顧行為臣如此在法難容某頃自歸  
朝頗推有勇俾之為將所以圖功及封疆多難之時車  
徒四出之際遂能激揚壯節措之師旅付以圭符而畏  
懦屢聞遁逃不暇震驚城守詿誤軍謀當此之時已宜

行法予以義深罪已功在止戈既屈身以弭兵乃含垢而務德復移郡寄仍綰使權苟奏課之有聞亦在人而何棄未終考績爰掇訟辭猶且累上表章屢言構陷洎遣制使明徵其辭乃自滁陽罷郡已來筠州移郡之後侵漁公帑積數且多干犯詔條為罪不一證據明具詞理並窮殊不省非更為文過謂競廝養為恥以對獄官為羞欲蓋彌彰侮我何甚其武勇也既如彼其誠心也又如此倘猶弘恕何以律人尚以君臣之間務全終

始特從薄貶庶克自新勉荷寬恩無重而悔

告天地文

臣以寡昧叨嗣慶基對越上玄申養長樂側身恭已靡敢荒寧而聖尊后自夏秋已來寢膳違裕醫藥備竭禱祠畢至數月於是有加無瘳憂勞之誠不知所措敢陳蠲潔仰告威靈伏惟精懇上通玄恩錫佑哀臣烏烏之志憫臣欒棘之心使六氣惟和百祥薦降冀於旦夕速就康寧臣內顧眇躬弗明於道方深慈訓之益欲報劬

勞之恩烝烝之懷區區於是隳滯肝胆以俟鑒臨

祭世宗皇帝文

稽古靈命造圖伊始聖人既生萬物咸理玄功格而高  
謝令問垂而不已通玉帛於無外執豆籩而萃止蓋百  
代之不易亦皇猷之至美恭惟盛德乃聖乃神爰初纘  
服舊邦維新瞻顧函夏寔始經綸三驅示禮四載彌勤  
濟之以武守之以文降鑒回慮全國庇民既戢兵而禁  
暴咸服義以歸仁功成理定返樸還淳羣賢在位百度



惟貞方將致宣王之薄伐焚老上之龍庭還師衽席檢  
玉云亭何祝壽之無感忽綴衣之在廷嗚呼哀哉神祔  
軒丘化流南國率感義以孺慕共銜哀而脂臆日月以  
之匿曜烟雲為之改色庸輯瑞之長違恨攀髯而不得  
嗚呼哀哉永惟下國獲嗣餘基奉天光而不早順文告  
以何遲仰霆電之震以警其失賴陽春之澤以赦其迷  
既賓禮之加厚亦恩情之過私大信有千齡之固承歡  
無再稔之期覽訃書而慟絕捧遺賜以漣洏嗚呼哀哉

集同軌於七月遇八音於四海喬山之冠劍長淹灞涘之  
川源不改敢薦忠信敬陳脯醢庶有感而必通願降神  
而如在

騎省集卷八

謹案卷六第一頁前六行風教所先原本所訛伐  
今改

第二頁後六行任賢尚齒原本尚訛而今改

第三頁前八行楊僕恥居關外原本僕訛僕據漢  
書改

第八頁前四行是用輟蘭錡之權原本錡訛綺據  
西京賦改

第九頁前四行泉州節度使留從効原本留作劉

據五代史改

第九頁後八行右撥嚴續除司空原本續訛續據  
南唐書改

卷七第二頁前七行並取齊王參決原本參訛恭  
今改

第四頁後四行趙丕御史中丞制原本御訛卿今  
改

第七頁前六行妖賊張茂賢按五代史及南唐書


俱作張遇賢

第九頁前六行劉仁瞻原本瞻訛瞻據五代史改  
後同

卷八第四頁後四行以益刊正之勤原本正訛王  
今改

第十一頁前行參預文雅挹其風度原本參訛  
恭挹訛抱今改





總校官庶吉士臣張能照

校對官學正臣李巖

謄錄舉人臣李元位

欽定四庫全書薈要

集部

騎省集卷

九至  
十一

詳校官助教臣常循





欽定四庫全書薈要卷一萬四千一百四

集部

騎省集卷九

宋 徐鉉 撰

冊九首 謚議一首

光穆后謚冊



維年月日嗣國主臣某再拜稽首言臣聞體厚德而母  
萬物存乎尊位騰耿光而蕃百世繫乎鴻名繼統廣業  
莫斯為重顧惟小子懼忝貽謀對越祖宗敢揚公議伏  
惟大行聖尊后姜任顯族皇英茂德作合元聖長發祥

符秉婦禮於儲闈正嬪則於四海孝心天賦惠問川流  
祚啟重熙尊歸理內率循陰教欽若皇猷順承利坤元  
之貞輔佐流周南之化慈撫公族仁懷六宮清淨廣於  
玄風戒慎刑于外戚用能永錫繁祉弘濟多難保佑沖  
人克荷丕構仰繫慈訓方恢景福靈臺告祲永樂長違罔  
極之懷觸緒荒殞恭惟尊名節惠之典載考儒臣禮官  
之稱咸以為光大孝悌之懿肅雍賢德之盛昭映前烈  
垂示無窮列辟承式弗敢失墜謹奉玉冊琮寶上尊謚

曰光穆皇后伏惟威靈如在鑒茲縟禮延九廟之積慶  
與二儀而長存嗚呼哀哉謹言

封保寧王冊

維保大元年八月丁未朔某日皇帝若曰稽古夷庚祗  
叶皇極侯樹屏翰保乂王家用能承運會昌歷世重光先  
哲所以啟後列辟所以時憲者也我思立愛宜有加焉  
咨爾二十弟某中和萃靈寬裕成德戲必俎豆之禮學  
無城闕之游聰明仁智仰遵前訓孝友姻睦率由生知

昭此玉音應於麟趾朕以不德凜乎丕承文武之功期  
無獨享契龜昨土抑為舊章今使某官持節冊爾為保  
寧王食邑二千戶敬之哉昔我文考對越上帝敷佑下  
民克儉于家無縱于逸再造之業與世無窮予以爾有  
邦膺受繁祉今爾尚迪遺烈保終令圖無從非彛無狎  
非正耆老是聽訓典是師綏寧乃封以永元吉

追封許國太妃冊

維保大三年太歲乙巳七月乙未朔某日皇帝若曰昔

在祖后法象天明旁求淑女式敷陰教並建內職以麗  
外朝故其先德之舉顯魂之命比爰庶尹無不及焉蓋  
敬終貽後之旨也咨爾故汝南郡君周氏恭儉執中明  
智資性頃諧法相入奉先朝紘紃之勤夙著於彤史湯  
沐之寵竟飾於泉扃粵予纂承祇稟茲訓家道既正國  
風以理仰蹈成式永懷舊人是用釐舉闕遺追崇名數  
昆吾舊宅太岳全邦申畫四封以光懿德今使某官持  
冊封許國太妃嗚呼令問不忘盛典無替昭昭復魂聞

予此言

蔣莊武帝冊

維年月日皇帝若曰稽古皇極訓民事神詔大號以崇  
正直之威垂大名以紀昭明之德牲幣有數典禮不愆  
政是以和神降之福莫不由斯者已若乃以死勤事沒  
而不朽流光儲祉蔣帝有焉惟帝冥符靈氣孕毓玄造  
嘉猷雄畧昭映前人在昔潛耀大川躍鱗下邑著艱難  
之節所以事君彰變化之神所以顯俗惟德是輔感而

遂通建福會昌以戡時難豐功厚德以享帝郊史臣執  
簡於無窮工祝正辭於不絕顧惟寡昧祇嗣龐鴻敢忘  
人謀以叶靈貺瞻言神岳作鎮皇州興運惟新禎符丕  
顯而位極於炎昊名謝於康惠墜典未舉予用慙焉濮  
陽諸姬寔纂服之舊邦尅亂除害乃庇人之盛業合為  
緡禮申告祠庭今使使某官持節奉冊追謚曰莊武帝  
嗚呼丹青懿烈光光如彼簡冊廟貌昭昭如此永為民  
正無乏神主之望焉

追封安王冊

維年月日國主若曰稽古大猷啟迪來裔蕃翰之寄重  
事也不以親屬為嫌寶玉之分盛典也不以死生易節  
昔在有魏蒼舒早世降及我唐子雲無祿咸用追啟王  
社飾於泉扃垂為憲章肆予遵舉咨爾某稟信厚之德  
持謙下之資在傳不勤為善最樂烝烝敬孝之性恂恂  
友悌之風及苴茅北藩授仕殿省別六尚之名物叅九  
伐之政令行以正直持之公平諸御知方羣校競勸職



修事舉朕甚多之爵止極於公封位未登於六事流光  
不待時望懽焉申予有慟之懷加爾飾終之禮冬卿峻  
秩楚澤全封丕舉茂章永光餘烈今命使某持節冊贈  
工部尚書封安王嗚呼延吳之懷予用多愧間平之德  
人其識諸簡冊無虧丹青不泯昭昭復魄亦克知之

追封豐王冊

維年月日國主若曰名器之重典冊之崇不以親疎為  
嫌至公之舉也不以死生易節歸厚之道也先哲彞訓

我儀行之咨爾某挺岐嶷之姿稟山河之秀亦既就傅  
時惟老成迪祖宗之猷不愆不忘奉詩禮之學惟幾惟  
勤公室所推藩屏攸寄秀而不實凋此妙齡天性所鍾  
永悼何已真王異數護塞雄藩舉為寵章飾彼幽壤今  
使使云云嗚呼分以寶玉苴以白茅弗及圖功猶足表  
德尚爾不昧知予此心

衛王劉仁贍改封越王冊

維年月日國主若曰忠臣之事君也歿且不朽王者之

念功也久而弗忘故賢哲膺期風烈所及千載之下若  
旦莫焉矧先朝舊臣藩方賢帥雄名大節震耀區中粵  
予纂承敢忘褒寵咨爾故某命世英傑奕葉勲庸便蕃  
寵遇茂著聲實間者輟自離衛鎮于壽春導德由威罔  
不率俾國步中梗邊烽載驚介然孤城橫制險地威畧  
所奮以戰則靡抗恩信所加以守則彌固社稷是衛豈  
惟封疆嗚呼壯圖中奪而英氣動于二國竒表長謝而  
忠規流于百代肆我文考爰極寵章崇為帝師建以王

社大名備物無不及焉咨予小子敬想先正聞鼙之感  
斯極飾壤之禮未行是用越于曩章再光贈典山陰大  
國會稽遺墟申畫四封永旌懿烈今遣使某官持節改  
封越王嗚呼忘身徇國其志如彼慎終追遠其厚如此  
永錫繁祉子孫保之

慶王進封陳王贈太尉冊

維年月日國主若曰古稱王者之貴必有先也豈不以  
在原之助義切于邦家陟岡之恩情均于存歿自非贈

飾之寵寧申敦叙之懷稽迪前經式揚盛典咨爾某受  
天正氣為國宗英器量川停機神秀出縱橫之智發為  
事業儒雅之度播為文辭自錫壤侯藩調兵蘭錡行令  
惟一撫下惟仁周廬不驚宸極甘寢天覆形于鍾愛時  
望極于維城景命不融儀表長謝壯圖大畧嗟時運之  
難并遺文餘烈綿歲序而常存粵予小子祇荷丕構奉慈  
訓于長樂頌公罷于懿親友于之恩追懷何已是用修  
嚴縟禮申告九原以王有文雅之稱故改封于陳社以

王有重厚之器故建號于上公光昭令猷永垂不朽今  
命使某云云噫花萼之游宛成今昔寶玉之數遂隔平  
生尚想明靈鑒茲永悼

追贈留從効父冊

維年月日國主若曰立身揚名君子所以顯父母也慎  
終追遠王者所以厚風俗也政之大者其可忘乎咨爾  
清源軍節度使留某父贈鄜州都督彥雄行當于躬量  
韜于世修誠明而應物積善慶以流光寔啟高門誕生

賢嗣建節風雲之會致身藩翰之權清寧一方表率羣  
后歲勤職貢恭守朝經位崇帝師勲在王府向非稟訓  
有自膺期而生則功勲所昭何以及此雖褒贈之典已  
賁于九原而督護之名未比于太府俾加纓禮薦洽朝  
章今遣使云云持節冊贈爾為潞州大都督嗚呼節鉞  
之貴命屈於生前典冊之崇禮符于不朽既足以光爾  
之有後亦所以表予之推恩昭昭有靈知我斯意

昭惠后謚議

臣聞廣莫極于坤元則含容光大擬議著焉尊莫隆于  
王后則窈窕思賢詠歌發焉是以上德無名而稱謂流  
于百代至道無象而儀刑表于萬方此固天理出于自  
然聖人所以無避者也矧惟節惠之禮百王盛典述德  
之議史臣至公誕昭耿光敢揚懿德伏惟大行國后生  
商遺烈安劉積慶淑質竒相惠問英才光映台華作儷  
公族紹隆藩閭載輯儲闈世子專寢門之禮孝心不匱  
大君以家人之慶天覆有加誠由肅雍之德叶此睦姻



之盛言內則者以為美談及屬運飛天尊歸配地嚴恭  
匪懈稟母儀於上宮慈惠積中率婦道于天下澣濯是  
服而六衣有煒環珮中節而九御有倫思脫簪之戒以  
成憂勤之政躬大練之飭以輔純儉之風陰教既孚王  
化茂遠方輿告變椒風永閔慟結長樂哀纏紫宸龜筮  
叶從攢塗將啟旌德之號彤管斯存若乃山河表德而  
文之以禮金玉其相而守之以恭垂訓以慈進賢以哲  
至於誦經習詩之敏審音知樂之明超然遠識亶絕終

古勤行孝養下自從化故寬裕懷于六宮天資明惠學  
無不通故遺愛鍾于宸眷載稽具美實光前烈謹案謚  
法德禮不愆容儀恭美皆曰昭慈哲遠識寬裕遺愛皆  
曰惠仰惟寔錄足表鴻猷謚曰昭惠后謹議

騎省集卷九

欽定四庫全書薈要卷一萬四千一百五

集部

騎省集卷十

宋 徐鉉 撰

碑銘五首

武成王廟碑

下臣伏讀前史窮探政經莫不以兵戰為危事目干戈  
為凶器異達人之格論蓋曲士之常談若乃上考洪荒  
選觀擬象九疇垂範何當棄從革之功五緯麗天詎可  
淪長庚之耀春生夏長非秋無以收成雷動風行非霜

不能肅殺先王設教誰敢渝之垂衣裳以正其本為弧矢以申其用阪泉戲難所以見軒后之神明丹浦鹿人所以成帝堯之光宅七旬來格本由舞羽之仁八百同辭始自莖枯之惠故修文廟堂之上者武功之始折衝千里之外者文德之形如仁而忘兵則西夏偃王以之而殞恃力而棄義則夫差羸政由是而亡乃知文德不修則武功不立武功不試則文德不昭相須而成其揆一也故立其教者謂之聖大其業者謂之賢聖則應天

順人西伯受代殷之任賢則開物成務太師有佐命之  
功當其偃息朝歌盤桓渭水量恢宇宙既處困而能通  
才冠生民亦俟時而後動雲雷之屯已構天人之契冥符  
厯數有歸君臣相遇投釣而起同車以還尊為王者之  
師我無慙德加之百官之上人絕異言大矣哉聖哲膺  
期無德而稱已故能式遏亂畧大拯橫流把白旄而誓  
師操黃鉞而助斷解倒懸之困釋比屋之誅大統既集  
天保已定然後式閭表墓歸馬放牛申義風于夷齊授

成事于旦奭宏開四履高視五侯及其德澤將衰風流  
已遠猶使紀侯大去不遺九世之讐周室既卑更賴一  
匡之業自非道充四表功濟三才孰能不顯光烈若斯  
之盛者也其後聖人既沒真風漸漓戰國如焚羣生殄  
瘁先王利器舉為爭奪之資闕里諸生率用縱橫之說  
遂使中都憤歎聿興末學之詞柱史傷嗟始發不祥之  
論流遁忘返積習生常則我武護之音將墜於地夫至  
公所以應羣動上德所以綜萬殊達其旨則左右咸宜

迷其本則弛張兩失自漢叅霸道魏濟奸雄藐爾千年  
荒哉七德國家參墟發命扈水膺圖羣黎興後之辭  
八表有宅心之地高祖奉天革政扇牧野之高風太宗  
屈已師臣躡渭濱之盛軌施其法則致其報入其國則  
思其人貞觀年中始於磻溪立廟玄宗祇若先訓奮發  
神謀平內難于女戎嗣鴻圖於代邸永言遺範重祀嚴  
禋開元中詔京師及天下州府並立太公廟著良辰於  
上戊抗紼禮於虞庠而復歷選前修式崇配享得其體

者叅入室升堂之列蹈其跡者儼樞衣函丈之容穆矣  
皇風煥乎甲令肅宗來朝走馬初嚴避敵之師九五飛  
龍遂荷在天之命澆戈既戮商奄猶驕方資戡定之勤  
更舉褒崇之詔禮尊南面位極真王取其大告之稱以  
定易名之典歷代之闕文備矣聖皇之能事烝哉故得  
靈鑒孔昭羣臣競勸諸侯供職函夏同文中興之功配  
天齊古雖復運逢興替時有安危造周之德既隆思漢  
之人常在烈祖沉潜剛克神武有徵靜氛瀛於蕭牆切



高庖正掃欒槍於丹微業茂賓門由是四海樂推三靈  
眷命光復舊物洪惟至公大道將行皇猷累洽今上允  
文允武克長克君自出震見離發號施令雷行天下豐  
宜日中信及豚魚仁霑行葦若夫尚齒尊賢之教宵衣  
旰食之勤制禮作樂之文返朴斲雕之質固已紛綸帝  
籙掩映瑤編猶復叶比臧謀疇咨庶政以為五材並用  
廢一不可天下雖平忘戰必危是故簡萬乘之人申九  
伐之令六官聯事百度惟貞副君以介弟之尊當撫軍

之任威而不猛動必以仁大元帥齊王明德茂親由諸  
王而宿衛副元帥燕王敦詩說禮以長子而帥師用能  
啟迪大中張皇下武其餘西京名將霧集星羅北府奇  
兵飈馳電駑並列雲臺之像咸開長水之營地利人和  
思浚慮遠域中無事則用之于進賢興功四方有變則  
用之于弔民伐罪故出車甌落則係以長纓鞠旅衡湘  
則舉為內地皆所以拯其塗炭之患息其沈閼之爭非  
徒夸大兵威兼并土宇而已至于篁竹萑苻之聚田昭

屈景之宗或粗舉先聲或聊分偏校莫不厥角稽顙請  
命卽刑吏不絕書野無遺寇斯乃聲明文物之外廟堂  
帷幄之間思未半之功已倍矣加以爲而不宰讓德於  
天潔粢豐盛靡違於時事春蘭秋菊遠被於無文乃顧  
戎韜式嚴邦政以爲三王四代之事罔不從師前哲令  
德之人必將崇祀列聖盛典實啟孫謀乃復舊章爰作  
新廟於是宗伯建位梓人授規入端門而右迴旁太學  
以西顧瞰康莊而列屏因爽塏而營基他山之石咸移

中伐之材畢萃成之不日自比靈臺揆彼方中寧慙楚  
室崇堂屹以特起高門豁其洞開筵有籩豆之區階有  
賓主之位干戈在序鐘鼓在庭綽然觀藝之場藹爾致  
誠之地春秋二仲時和氣清醴醖交羞牲牷不疾鵠冠  
礪劍展告虔薦信之儀玉戚朱干儼象德達神之列中  
軍元帥出建靈旗六郡良家來登勇爵旆旌鐃吹桓桓  
推轂之威金石絲篴穆穆宴毛之序觀之者亂臣知懼  
比夫漢尊黃老詎臻清淨之源秦用刑名徒有深刻之

弊中庸之德其在茲乎嗟夫聖人沒而微言絕王澤竭而頌聲息奚斯路寢諸侯之事何觀吉甫清風衰世之音孰尚豈若帝圖光赫聖作宏新人知鼓篳之方家識止戈之漸固可著之金石列在鼎彝微臣學媿常師用慚兼備承明再入固無經國之才宣室微還幸對受釐之問將使延州聽樂長聞雅正之聲圯上受書世出帝王之佐敢揚丕訓敬勒貞珉其銘曰

闕

於惟基命建用皇極實有武備以昭  
文德弗惠弗迪是糾是殛天地剛柔惟帝之則是則是  
效文王武王惟師尚父時維鷹揚匡正天下綏爰四方  
微禹之烈于湯有光肅肅牽牲皇皇表海簡禮從質因  
民不改難老曰壽專征為大決決之風至今猶在大道

既隱明王不遭走鹿爭逐賴魚告勞泯若四履紛吾六  
韜我思古人心焉忉忉天或愛民物無終否率此叛國  
歸于聖帝自葛初征至牧乃誓君子萬年本枝百世鴻  
圖再造二聖重光亦既大賚寧惟小康六事允釐四維  
孔張夢寐卜獵咨嗟釣璜虎踞之陽龍藏之渙爰作新  
廟畢崇明祀朱門交戟玄礮納陞寃竄崇重浚與祕  
名光大告禮重真王侑神祀食入室升堂威儀文物容  
貌采章列聖有作茲焉不忘膠庠既成教義既明三湘

即序百越來庭馬無南牧人怨東征烈烈政典洋洋頌  
聲商郊車騎灌壇風雨績用不泯威神若睹鏤金石以  
表德薦馨香而受祐春蘭兮秋菊無絕兮終古

蔣莊武帝新廟碑銘

臣聞南正司天授宗祝史巫之祝春官掌禮詔犧牲玉  
帛之儀皆所以別類人神統和上下三時不害力嗇以  
之普存百物阜安薦信徵其多品用能舉明德而徼景  
福播和樂以致靈祇三五已還皆是物也若乃渾元宣



氣山岳成形雲雨於是乎生財用於是乎取故有毳冕  
之服璋邸之符或以肆瘞垂文或以度懸著法虞舜聖  
帝也而有徧于之祀周武明王也而有惟爾之祈至於  
祊田高邑之都藻蒞桑封之秩稭稭有羨蘭菊無虧大  
典竒篇論之備矣後王祖帝聞斯行諸金陵山者作鎮  
揚都盤根福地峙天險之左次瞰臺城之北隅陽嶺前  
瞻包舉青林之苑陰崖右轉經營玄武之池絕巘嶽岑  
蔽虧日月深巖窈窕吐納風雲層臺累榭臨其嶺涌泉

清池湛其下白鹿麕麕騰其藪駕雛孔翠栖其林豫章  
梓杞之材橘柚楸梨之實赭堊丹青之美錫銀金碧之  
饒固以事異假珍富兼諸夏登于軌物掌以虞衡矧復  
奇怪中潛網緼上屬真人未應瘞雜寶以祈年智士攸  
同指盤龍而建國亦何必嵩丘發峻始號降神岷嶺騰  
精獨稱建福自時厥後代富靈游刺史還都即有栽松  
之地諸生肄業非無講學之場岫幌雲關訪徵君于幽  
谷鹿巾霞帔集道侶於中林斯亦群帝之密都先王之

冊府者也在昔霜鍾細品猶淹耕父之居反景微光尚  
駐長留之駕况乎皇州列岳宅恠儲靈不有吉神執司  
陰騭蔣帝孕清明之氣稟正直之資實九德之所生與  
五龍而比翼自西江考績謝聯事於玄夷北部申威輯  
底功于黃綬于時祚終四百運偶三分人懷塗炭之愁  
家有剥膚之痛帝則勤勞徇物慷慨憂時既授張敞之  
倖即振李崇之鼓赤丸未盡執漢節以忘生青骨難誣  
降北山而受享飛蟲顯俗生民之舒慘焉依白馬耀奇

平昔之威容如在故使中都之印式報陰功長水之營  
旁旌同氣廬宮改命非因介子之焚廟貌崇壇詎比愚  
公之徙自是光靈茂遠代祀綿長或昭德而降祥或害  
盈而致罰黃旗紫蓋奉五馬之禎符朱鬣碧蹄修高山  
之巨盜賢如謝傅猶繫草木之形親若始安亦假弟兄  
之助故得王封錫羨帝服歸尊追炎昊以齊稱躅虞黃  
以接武事光典冊惠浹幽遐任水木之遞遷顧高深而  
自改國家錄圖受社黃鉞庇人分二牧于土中包九有

于宇下雖十聯百里亟更守宰之權而四望五郊不易  
宗彞之數及威名暫失龜鼎中遷瀛海颺迴坤輿幅裂  
而盤礴之際常奉周正封域之間獨為漢守衣冠舊族  
宛洛遺氓咸趨懷德之鄉共免永嘉之亂終使皇天眷  
祐百姓與能克昌再造之基奄有六朝之地烈祖功踰  
嗣夏體濬哲而致中興皇上德邁繼文懋元良而恢下  
武格天光表慰率土之詞謠累洽重熙漸羣黎之肌骨  
所以珍符總至靈命畢陳極金匱以標年盡瑤編而紀

瑞襲于六藝貫彼三墳矧復聖作無方神謀不測殷周  
損益文武弛張制在先機申于後甲百吏奉行而不暇  
兆民日用而不知帝典恢宏天文貞觀摘華發藻挾賸  
披聲丹浦非好戰之師兩階有誕敷之舞坐知千里廓  
清五嶺之氛後不踰時底定七閩之難國風王澤自北  
而南樹立之權由來尚矣康無專享止崇藩屏之封穆  
弔不咸但著急難之詠未有極至公之舉正太弟之尊  
大義鴻猷如今日之盛者也副君膺則哲之寄有聖人

之資由上德而貞萬邦用英才而摠百揆麗正繼明之  
業仰奉宸謀持謙敬客之心甫懷庶品則有齊藩上寄  
紆璽綬而握兵符燕邸真王珥貂冠而掌宮籥周公則  
武王之弟夏啟則吾君之子故能緝熙帝載寅亮天工  
晏平仲之論和北宮子之謂禮自家刑國草偃風行上  
下之際既交華裔之情如一黑齒奇肱之俗款塞來王  
碧嵩素滌之濱除宮望幸后夔典樂已播薰絃司馬進  
稱行陳祕檢功既隆矣德亦厚矣尚復往而未止謙以

益尊政靡不修思無不及以為無文成秩訓誥之格言  
明祀是崇春秋之大義農祥晨正豐潔四馳密雲不雨  
馨香並薦載紆睿鑒爰顧遺祠詔曰蔣帝受命上玄奠  
職茲土力宣往代澤被中區所謂有益于人以死勤事  
者也今號位已極名謚弗彰闕典未申朕甚不取其以  
勝敵克亂之業為民除害之功因姓開國追謚莊武仍  
令有司修寢廟備制度焉于是即舊謀新審形面勢農  
工告隙營室方中或懸水以為規或飭材而攻木塼埴



之工腐至巧塋之伎星羅徑術常夷靡薙王孫之草荆  
榛舊闢寧誅宋玉之茅百堵齊興自歲而畢繚垣十里  
重屋四周樹文王於庭中交枝霍靡挺開明于閩外詭  
狀髻髻納陞逶迤碧疊元州之石橫梁天矯雪披後渚  
之梅豁朱戶之瞳矚陽光不夕閩溪宮之靈霽暮靄常  
霏堂上布筵楹間設奠管磬鐘鼓羅于下邊豆簋簠肆  
于前再變之音克諧永貞之祝無愧神光倏忽褰服連  
蜷孔蓋翠旌若有光而罔覲蕙肴蘭籍若有歆而不亡

用是高揖靈玄永司純嘏罔兩魑魅豈煩夏鼎之圖風  
雨雪霜無待桑林之禱則知民和而後降福事理而後  
不祈人祇之間如斯而已者也粵若先王命祀神道教  
人前哲令德之流九魁六宗之類或以公族視秩或以  
戶邑奉祠子晉之為帝賓真階匪極傳說之騎龍尾景  
耀未融斯皆地勢本高升聞易達詎有權輕五技壤狹  
一同而能比敬軒臺分光堯日縱質文之迭改代奉典  
章及聖哲之丕承更加崇飭故金簡玉字興王之統可

尋兩騎五車受職之期斯在雖將厯選安得同年昔者崑  
閩窮遊尚紀白雲之什燕然薄伐亦陳玄甲之銘孰與冥  
貺昭彰壽宮宏麗水通懸圃萃氣色於閭門路接白楊煥  
丹青於駟野此而莫述後嗣何觀微臣潤色無功討論奚  
取思問神於先聖姑欲事君苟獲罪於玄宮曷容媚竈  
惟於舊史想見英風適當罷役之初爰奉屬辭之詔西州  
作頌誠慙邑子見稱南國刊銘或望至尊所改庶使千八  
百國會執玉于茲峯七十二家配泥金于此地其銘曰

茫茫玄造萬物資始一經神怪一緯人理先聖則之以  
著網紀仰觀俯察上天下地高卑既定品物咸宜宣  
氣者山配地曰祇三公是擬九德攸司天作金陵蔣  
帝荒之巖巖金陵作鎮上國陰林巨壑材生物植洞  
穴巖房逶迤詰屈隱士無言仙童不食洪惟廟貌奠  
此名區位重天孫權傾陸吾薜荔之服辛夷之車若  
自空桑來游下都翼翼京揚馮馮輦轂運屬多壘聿  
祈深福峻殄堅夷勛亡景覆肝蠻玄功威蕤帝錄皇

唐膺命和悅人神崇名則舊受職惟新祥圖雜集祀典  
紛綸終全王土以俟真人再造延洪繼文光大陰陽不  
測天地交泰沒羽梯航雕題冠帶成民致力祭神如在  
猶防闕典乃秩遺靈永懷簡冊欽若昭明克亂除害膺  
茲大名亦有制度備于祠庭式瞻昏定昏定既正爰揆  
農時農時弗虧虞衡肅給般垂交馳加之龍磬斲益以章  
施新廟既成神居既寧我有常祀蒸饒薦腥匪崇匪祈  
歆我惟馨三時不害大庖不盈昔在周家逮于漢室徒

騁騏驎虛羅甲乙純嘏弗臻斯猷愈失載返靈風爰歸  
聖日五衢植木四照栽花馳烟驛霧晦景韜霞方介十  
巫何憂一車行觀吉玉願折踈麻謝傳長逝王公不作  
獨我莊武先紆睿畧魯墳無棘遼城有鶴刻此苔華永  
傳嵩霍

武烈帝廟碑銘

臣聞昊穹凝命玄化不宰司契牧民之重授以聖功益  
謙輔德之明顯諸神道玉燭景風之瑞所以報憂勤天

時地物之妖所以警安逸是以古之聖人覩災而懼因  
敗而成撥亂反正之勲偃武修文之業延洪光大皆有  
幽贊者焉故禹奠九州受蒼水繡衣之命武師牧野接  
五車兩騎之神或假靈于五將三門或取象于長庚北  
落竒怪惚恍歷代有之然則潔粢豐盛崇名紀號欽若  
天意丕顯陰功元元本本政之大者也茲我后所以側  
身修德允濟時屯武烈帝所以禦災釋患光膺帝服人  
神合應豈不偉哉惟帝才冠生民道高振古登賢能于

鄉老論昭穆于本朝若夫忠孝文武之風信智言行之懿提綱按部之績夷兇靜亂之勤論道經邦之猷宮懸錫馬之寵忠身殉國之節驚愚顯俗之奇固已炳煥丹青鏗金石用能高標名祀大庇蒸民犧牲玉帛數有加于羣望備物典冊禮遂縟于真王是知妙極無方數均不測告禎符于闕









獨能雖通幽洞靈寶聖哲之所務而問神語怪非典冊  
之攸先故揚擢而論蓋史臣之職也主上以功成弗處  
無德不報增封進號厥有舊章乃下詔冊贈武烈帝備  
名數禮也於是正南面之尊窮大壯之勢眈眈新廟奕  
奕崇堂雉門兩觀之嚴左城右平之制龍旂鑾輅雲罕  
軒懸兼三代之盛儀抗五郊之殊禮與夫周人革命止  
陳玄牡之祈晉室主盟但用朱絲之禱報功之典不亦

盛乎常州刺史何重貴初領前軍獨當強寇以忠貞為  
甲冑以恩信為金湯首挫賊鋒力全郡壘褰帷之任因  
以疇庸坐樹之風更成德讓皆足以光昭雅頌垂示來  
雲後之君子知天命不可以智欺大福不可以力勝幸災  
怙亂鬼而得誅背盟奸好人將誰與覆車斯在殷鑒匪遙  
類委土以為師樹豐碑而紀事下臣奉詔謹勒銘云

玄功不宰帝德無為化機冥運羣動交馳必有神道鑒  
而董之董之伊何惟帝之職恍惚有象陰陽不測如岳

降祥配天輔德保我蒸民莫匪爾極偉哉間傑多藝  
多才名馳八紘位重三槐祀典光啟王封肇開人思  
邵樹俗畏軒臺洪惟我后積仁累慶運啟再造功宣  
二聖金鑑在握璿璣以正陰陽既和人神交應時災  
有數孰克違斯靈命自天疇能間之盜兵竊發玄貺  
冥期風雲鼓蕩氛厲殲夷蔣侯助順霍山啟道卑聽  
匪遠誠明則到上曰欽哉享茲昭告帝服加尊大名紀  
號多壘既平連營既寧奕奕新廟崇崇百城民罔疵癘

年斯順成庭有備物時殷頌聲禍福何常惟人所擇棄  
信毀義恃衆與力上帝不蠲明神是殛勒石嚴祠敢告  
萬國

重修筠州祈仙觀記

筠州祈仙觀者東晉黃真君上升之地因為道館綿歷  
代祀互有增修國朝保大中元宗皇帝奉為吳讓皇再  
加營構金石具刻此不備書夫言意假象故立朝修  
之所形器有壞故資繕完之工此觀當荆楚之要津寔

郵傳之便道過賓稅駕遊子解裝憧憧往來罕或虛月  
自葺之後二紀有餘開閤垣墉頽落且半道士羅自正  
總攝真侶啟煥玄風以為道由人弘德以勤廣不飾不  
美人其謂何於是心謀躬行節用畜力授其徒之可任  
者會其士之好道者月省歲計經之營之即舊謀新興  
廢補闕十有餘歲其績大成凡建聖祖殿黃真君殿各  
一區峙瑤壇範洪鐘造橫橋於通津植茂樹而蔽野其  
脩舊振壞者層樓重廊二十餘間其取材也時其擇匠



也良程之以壯督之以固瓴甌璵璣尚其密藻繪丹雘  
尚其麗帑廩不費工庸不勞煥然新宮峙此靈境君子  
是以知其能也夫神仙之事史臣不論豈不以度越常  
情非擬議所及故邪仲尼書日食星隕皆略其微而著  
其顯慮學者之致惑也又况於希夷恍惚之際乎然而  
載籍之間微旨可得書云三后在天詩云萬壽無疆斯  
皆輕舉長生之明效也及周漢而降則事跡彰灼耳目  
不誣天人交感民信之矣於是通儒洪筆始著於篇至

如許君黃君通幽洞冥窮神極妙逮爾姻族與夫家人  
乘景上躋超然絕俗故墟舊井真氣徘徊至其鄉而思  
其人仰其道而踐其跡斯觀之盛豈徒然哉鉉頃歲扈  
從南巡有事於游帷之觀二宮相距兩舍而遙使指有  
程瞻望弗及逮今一紀無日忘之會羅君狀其功績圖  
其形勝見託紀述欣然而書開寶七年九月二十四日  
記

筠州清江縣重修三清觀記

元氣既判天地乃位氣之清明靈粹者鍾乎洞天福地名山大川之間真聖之所戾也景福之所興也然則游居走望乃建道館焉通都大邑往往而在豫章之地寔曰奧區帶豫章之通川據西山之雄鎮鬱映磅礴神異所棲高真十二震曜方夏方靈執轍靡迤蟬聯保大庚戍歲詔復高安縣為筠州析其北鄙為清江縣而三清觀負新邑之左瞰長江之右形勝高竒壇宇嚴淨聞諸故老云昔吳許二君嘗游茲地夜覩青氣上屬於天相

與嘆曰此非凡地當為神仙之宅及二君登宸之後邑人追感前言共構茅茨歲時薦獻衆目為草堂道院函闕紫氣事往名存蓋屋草樓人非郭是年世彌遠增修益崇開成中始詔賜號三清之觀自時厥後又踰十紀運逢治亂道有污隆中興已還百度咸復宮得其守人盡其能道士吳宗元允迪玄風克堪道任以為朝禮之域飈歛所臨不飾不美衆將安仰於是月考歲計庀工飭材補廢扶傾無所不至建三清之殿造虛皇之臺設

待賓之區敞飢賢之室範華鐘之鏗勾構層樓之宕亭  
回廊複道重浚奧祕於是飾儀衛備器用肅然必洽煥  
焉可觀夫其誠至者其禮備其守固者其事舉道

闕





騎省集卷十